



Broj: 20-02-34633-5/23
Sarajevo, 29.09.2023. godine

Na osnovu člana 19. st. (1) i (2) i člana 23. Zakona o prevenciji i suzbijanju korupcije u Kantonu Sarajevo („Službene novine Kantona Sarajevo“, br. 35/22, 44/22-Ispravka i 52/22-Ispravka) Ured za borbu protiv korupcije i upravljanje kvalitetom Kantona Sarajevo donosi:

ODLUKU

(1) Nakon provedenog postupka utvrđivanja postojanja sukoba interesa za Išerić Saliha, Ured za borbu protiv korupcije i upravljanje kvalitetom Kantona Sarajevo utvrdio je postojanje sukoba interesa za imenovanog, jer isti obavlja dvije javne funkcije, i to javnu funkciju vijećnika u Općinskom vijeću Stari Grad Sarajevo i javnu funkciju člana Odbora za urbanizam i upotrebu lokalnog zemljišta u Gradskom vijeću Grada Sarajevo, što predstavlja povredu člana 5. stav (1) Zakona o prevenciji i suzbijanju korupcije u Kantonu Sarajevo.

(2) Poziva se Išerić Salih da podnese ostavku ili da na drugi način odstupi sa jedne nespojive javne funkcije navedene u tački (1) ove odluke, i to u roku od 30 dana od dana prijema ove odluke, te da o istom obavijesti Ured za borbu protiv korupcije i upravljanje kvalitetom Kantona Sarajevo.

O b r a z l o ž e n j e

Ured za borbu protiv korupcije i upravljanje kvalitetom Kantona Sarajevo je nakon izvršenog uvida u Registar podataka o imovini nosioca javnih funkcija u Kantonu Sarajevo i na internet stranicu Grada Sarajevo, 01.08.2023. godine, konstatovao da Išerić Salih obavlja dvije javne funkcije, i to javnu funkciju vijećnika u Općinskom vijeću Stari Grad Sarajevo i javnu funkciju člana Odbora za urbanizam i upotrebu lokalnog zemljišta u Gradskom vijeću Grada Sarajevo, imenovan od strane ovog vijeća, što je u suprotnosti sa članom 5. stav (1) Zakona o prevenciji i suzbijanju korupcije u Kantonu Sarajevo, koji propisuje da nosilac javne funkcije može istovremeno obavljati samo jednu javnu funkciju iz člana 2. tačka c) ovog zakona, osim ako posebnim propisom nije drugačije određeno.

Shodno članu 12. stav (1) Zakona o prevenciji i suzbijanju korupcije u Kantonu Sarajevo, Ured za borbu protiv korupcije i upravljanje kvalitetom Kantona Sarajevo je Rješenjem broj: 20-02-34633/23 od 01.08.2023. godine, pokrenuo postupak za utvrđivanje postojanja sukoba interesa za lice Išerić Salih. Predmetni postupak je pokrenut po službenoj dužnosti.

Ured za borbu protiv korupcije i upravljanje kvalitetom Kantona Sarajevo je aktom, Obavijest o pokretanju postupka za utvrđivanje postojanja sukoba interesa i zahtjev za pismeno izjašnjenje broj: 20-02-34633-1/23 od 01.08.2023. godine, a shodno članu 16. stav (1) Zakona o prevenciji i suzbijanju korupcije u Kantonu Sarajevo, obavijestio imenovanog o pokrenutom postupku za utvrđivanje postojanja sukoba interesa, te je zatražio pismeno izjašnjenje na navode iz ove obavijesti. U prilogu

akta od 01.08.2023. godine, imenovanom je dostavljeno Rješenje broj: 20-02-34633/23 od 01.08.2023. godine.

Izjašnjenje na navode iz Obavijesti o pokretanju postupka za utvrđivanje postojanja sukoba interesa i Zahtjev za pismeno izjašnjenje od strane Išerić Salih, ovaj ured zaprimio je 17.08.2023. godine. U Izjašnjenju imenovani ističe da su navodi iz akta Ureda za borbu protiv korupcije i upravljanje kvalitetom Kantona Sarajevo, od 01.08.2023. godine, djelimično tačni i to u dijelu kojim se konstatuje da je Išerić Salih vijećnik u Općinskom vijeću Stari Grad, ali da su isti netačni u pogledu imenovanja u Odbor za javne službe, infrastrukturu i javni saobraćaj u Gradskom vijeću Grada Sarajeva.

Nadalje, imenovani u Izjašnjenju osporava konstataciju da se radi o nespojivim funkcijama ili o sukobu interesa, a kako navodi u ovom aktu „Funkcija člana Odbora nije nespojiva onom na koju sam izabran ranije na lokalnim izborima 2020. godine. Obnašanje ove dvije funkcije, ne može rezultirati sukobom interesa“. Također navodi da je u Gradsko vijeće imenovan kao stručnjak iz oblasti urbanizma imajući u vidu radno iskustvo i ekspertizu.

Nakon ponovnog uvida u spis/dokumentaciju, Ured za borbu protiv korupcije i upravljanje kvalitetom je ustanovio da je u Obavijesti od 01.08.2023. godine pogrešno naveden Odbor za javne službe, infrastrukturu i javni saobraćaj u Gradskom vijeću Grada Sarajevo, te je Ured donio Zaključak o ispravci greške u Rješenju broj: 20-02-34633/23 od 01.08.2023. godine, broj: 20-02-34633-2/23 od 24.08.2023. godine i isti dostavio Išerić Salihu.

U ovom zaključku navodi se da u dispozitivu i obrazloženju Rješenja broj: 20-02-34633/23 od 01.08.2023. godine umjesto: „Odbor za javne službe, infrastrukturu i javni saobraćaj“, treba da stoji: „Odbor za urbanizam i upotrebu lokalnog zemljišta“.

Zaključak je sastavni dio rješenja i ima pravno dejstvo od dana od kojeg pravno dejstvo ima i rješenje koje se ispravlja predmetnim zaključkom.

U cilju pravilnog odlučivanja u predmetnom slučaju, Ured za borbu protiv korupcije i upravljanje kvalitetom Kantona Sarajevo je uputio Zahtjev za dostavljanje dokaza, broj: 20-02-34633-3/23 od 25.08.2023. godine, Centralnoj izbornoj komisiji Bosne i Hercegovine, i to u pogledu dostavljanja kopije akta o dodjeli mandata vijećnika u Općinskom vijeću Stari Grad Sarajevo, Išerić Salihu.

Također, ovaj ured je uputio Zahtjev za dostavljanje informacije i dokaza, broj: 20-02-34633-4/23 od 25.08.2023. godine, Gradu Sarajevu, Gradskom vijeću, i to u pogledu dostavljanja informacije ko su trenutni članovi Odbora za urbanizam i upotrebu lokalnog zemljišta u ovom vijeću.

Ured za borbu protiv korupcije i upravljanje kvalitetom Kantona Sarajevo je 04.09.2023. godine zaprimio Odgovor broj: 06-1-07-1-454/23 od 30.08.2023. godine, od Centralne izborne komisije Bosne i Hercegovine, u kojem se navodi da je provjerom u službenim evidencijama Centralne izborne komisije Bosne i Hercegovine, te uvidom u Odluku Centralne izborne komisije Bosne i Hercegovine o potvrđivanju i objavljivanju rezultata Lokalnih izbora u Bosni i Hercegovini 2020. godine, 05-1-07-1-2100-1/20 od 15.12.2020. godine („Službeni glasnik BiH“, broj: 81/20) utvrđeno da je Išerić Salih, na Lokalnim izborima 2020. godine, izabran za vijećnika u Općinskom vijeću Stari Grad Sarajevo, te da imenovani još uvijek ima mandat u Općinskom vijeću Stari Grad Sarajevo. Kao dokaz za navedeno, u prilogu Odgovora od 30.08.2023. godine, dostavljena je kopija Uvjerenje broj: 06-1-07-01-2103-2-2517/20 od 15.12.2020. godine kojim se dodjeljuje mandat Salihu Išeriću u Općinskom vijeću Općine Stari Grad.

Ured za borbu protiv korupcije i upravljanje kvalitetom Kantona Sarajevo je 06.09.2023. godine zaprimio Informaciju, broj: 01-GV-04-1212-2/23 od 06.09.2023. godine, od Grada Sarajeva, Gradskog vijeća, u kojoj se navodi da je Salih Išerić član Odbora za urbanizam i upotrebu lokalnog zemljišta, imenovan Odlukom o izboru članova radnih tijela Gradskog vijeća Grada Sarajeva broj: 01-GV-02-363/21 od 28.04.2021. godine. Kao dokaz za navedeno, u prilogu Informacije od

06.09.2023. godine, Grad Sarajevo, Gradsko vijeće dostavilo je kopiju Odluke o izboru članova radnih tijela Gradskog vijeća Grada Sarajeva broj: 01-GV-02-363/21 od 28.04.2021. godine.

Imajući u vidu navedene zakonske odredbe, kao i član 2., stav (1), tačka c), koji propisuje da se nosiocima javne funkcije smatraju, između ostalih i vijećnici u općinskim vijećima općina na teritoriji Kantona Sarajevo, kao i druga lica koja su izabrana ili imenovana od strane Gradskog vijeća Grada Sarajevo, te činjenicu da imenovani istovremeno obavlja dvije javne funkcije, i to javnu funkciju vijećnika u Općinskom vijeću Stari Grad Sarajevo i javnu funkciju člana Odbora za urbanizam i upotrebu lokalnog zemljišta, što predstavlja povredu odredaba člana 5. stav (1) Zakona o prevenciji i suzbijanju korupcije u Kantonu Sarajevo, Ured je utvrdio postojanje sukoba interesa za Išerić Saliha.

Nosilac javnih funkcija, Išerić Salih, dužan je u roku od 30 dana od dana prijema ove odluke, podnijeti ostavku ili na drugi način odstupiti sa jedne od javnih funkcija koje istovremeno obavlja i o tome pismeno obavijestiti Ured za borbu protiv korupcije i upravljanje kvalitetom Kantona Sarajevo.

Shodno navedenom, Ured za borbu protiv korupcije i upravljanje kvalitetom Kantona Sarajevo je u skladu sa članom 19. st. (1) i (2) Zakona o prevenciji i suzbijanju korupcije u Kantonu Sarajevo odlučio kao u dispozitivu ove odluke.

Ova odluka stupa na snagu danom donošenja i obavezujuća je za nosioca javnih funkcija.

Pouka o pravnom lijeku: Ova odluka je konačna i protiv iste nosilac javnih funkcija može pokrenuti upravni spor.



Dostaviti:

1. Imenovanom,
2. Za objavu na internet stranici Ureda za borbu protiv korupcije i upravljanje kvalitetom Kantona Sarajevo,
3. a/a.